

GILBERTO FRANÇOIS (BETICO) CROES - ESTADISTA Y POLITICO ARUBANO

Gilberto François (Betico) Croes a nace na Aruba dia 25 di januari 1938. Despues di a bay scol na Aruba el a sigui su estudio na Hulanda, logrando su "Hoofdakte". Durante su estadia na Hulanda e tabata masha activo den organizacionnan Antiyano. Despues cu Betico a regresa Aruba, el a eherce su funcion di maestro di scol na St. Jozefschool na Sta. Cruz. Ademas di esaki e tabata hopi activo riba tereno deportivo, musical, cultural y social. Apesar di tabata un persona hopi ocupa, el a logra obtene Spaans L.O. y Handelskennis L.O. y a continua cu su profesion di maestro na St. Antonius College.

Na aña 1967 el a drenta politica como candidato riba lista di A.V.P. y e mesun aña el a bira miembro di Eilandsraad pa despues bira diputado di Enseñanza. Despues cu Shon A. Eman, lider di A.V.P., a fayece, a surgi diferencianan fundamental den A.V.P. cu e consecuencia cu Betico a distancia su mes di e partido ey y dia 9 di februari 1971 el a funda Movimiento Electoral di Pueblo, M.E.P., di cual el a bira lider.

Na aña 1972 el a cuminsa su lucha pa Status Aparte di Aruba. Durante un Conferencia di Reino na Suriname, partidonan di Antiyas a boga pa un federacion di 6 isla a base di "one man, one vote". Betico a bandona e Conferencia pa consulta cu pueblo di Aruba prome. Consecuentemente Betico acompaña pa un delegacion di Aruba a biaha e mesun aña pa Hulanda cu e meta di convence Hulanda di Aruba su deseo ferviente pa ta soberano den Reino. Esaki a haya realce dia 18 di maart 1973 den Wilhelmina Stadion caminda pueblo di Aruba a demonstra di ta serio den su demanda y deseo di obtene su Status Aparte; esaki tabatin como resultado inauguracion di Aruba su Himno y Bandera dia 18 di maart 1976.

Dia 21 di september 1978 Betico, como e prome politico Antiyano/Arubiano, a haya e oportunidad di dirigi su mes na Parlamento Hulandes, cual hecho a duna inicio na deliberacionnan pa Aruba sali for di

e constelacion Antiyano. Dia 17 di januari 1979 a instala un Comision di Reino cu Betico tambe como miembro. E Comision aki tabatin como obhetivo pa studia e diferente posibilidad- y alternativanan pa un Status Aparte pa Aruba.

Segun cu tempo a transciri, Aruba su lucha pa Status Aparte a haya mas reconocimiento na Hulanda. Betico a ocupa e posicion di Presidente di e Comision pa Independencia di Aruba. Na aña 1983 despues di un conferencia di mesa rondo (R.T.C.) a keda cumbini cu Aruba lo haya su Status Aparte dia 1e di januari 1986. Na mei 1985 Parlamento Hulandes a acepta pa bini cu cambio di Statuut permitiendo Aruba pa haya su Status Aparte.

Lamentablemente Betico no a haya e oportunidad di disfruta di e Status Aparte cu tanto el a lucha p'e, ya cu dia 31 di december 1985, faltando apenas un par di ora pa Aruba bira un pais autonomo den Reino, el a sufri un accidente grave cu a lague 11 luna den coma. Dia 26 di november 1986 Betico a fayece na Hulanda. Betico tabata casa cu Glenda Croes y tabata tata di cuater yiu.

Pueblo di Aruba semper a keda corda e palabranan di Betico cu a bira historico: "Si mi cay na caminda, gara e bandera y sigui cu e lucha".

Aruba a honra memoria di e gran estadista Arubano aki develando su estatua riba Plaza Libertador Betico Croes na Vondellaan. Servicio Postal di Aruba pa conmemora e decimo Aniversario di Status Aparte y di decimo fayece-mento di Betico ta honra su memoria cu un stampia special na balor di 100 cent, dia 1e di januari 1996.

